

tam suo, quam Insularum aliquot objectu, placidum nautis æquor efficit. Sub hac Dicecesi Insulæ sunt *Samsoe*, *Hielm*, *Tuen*, *Hiarnoe* Gerno forte, *Hilgenes* & aliæ plures. *Vandalica* quæ & *Burglaviensis* Dicecesis, Præfecturæ tredecim & Civitates sex habet. Partes ejus maxime illustres sunt *Wendsyssel*, *Handhæret*, *Thyland* & *Morsoe*. *Wendsyssel*, sive *Vensilia*, id est, *Vandalorum* terra & sedes, Præfecturas sex, Opida tria & Arcem unam habet. Hic est mons *Alberg* in quo gigantum monumenta conspiciuntur. Adjacent Insulæ *Grysholm*, *Hertzholm*, *Tydsholm* & aliæ. In *Handhæret* est rupes visendæ altitudinis, *Skarringklint* dicta, & in oris ejus *Syrtes*, quas *Sandores* & *Braccas* vocant. Ei sub sunt Insulæ *Oland* & *Oxeholm*. Præfecturas quatuor, Opidum unum nomine *Thystad*, ubi Christianus tertius scholam juventuti primus condidit, & Arcem unam *Orumnam* habet. Sub ea sunt Insulæ *Hansholm*, *Ostholm*, *Jegen*, *Cisland*, *Egholm*, *Bodum*. *Morsoe*, Præfecturas tres, unicam Civitatem *Nicopiam*, & Arcem unicam *Lundslod* habet. Insula ei adjacet una, *Ageroa*. *Wiburgensis* dicecesis Præfecturas sedecim, Civitates tres & totidem Arces complectitur. Viburgi generale Concilium Triumvirorum nobilissimorum & sapientissimorum de causis civilibus cognoscendis & dijudicandis, toto fere anni spatio continuatur, nisi ubi inquietæ functionis molestiis defatigati, se in prædiis suis paullulum recreant & vires recolligunt. Huc universæ Cimbricæ Chersonesi casus, querelæ de finibus & hereditatum controversiæ, omnesque capitalium causarum animadversiones, cujusmodi sunt cædes, adulteria, furta & veneficii crimina deferuntur. Ad *Wensliam* Peninsulam, ubi in conum desinens, paullatim se ad Solis ortum æstivum inflectit, est *Mare*. ille Intiæ angulus, ob pericula nautis adeo formidabilis. Nam ingens dorsum & Syrtis longissime se in Mare protendit, ut, qui tuto & citra periculi metum esse volunt, non propius duobus milliaribus ad littus accedant. Tale est omne Intiæ littus Occidentale, ut qui in Norwegiam, velex Oceano in Orientem navigare intendunt, longo circuitu Intiam evitare cogantur. Sunt tamen quatuor omnino Montes in hoc littore, ex quibus nautæ habent suas observationes & indicia. Incolæ hujus tractus piscaturam exercent. Cum autem Portum, & fidam navibus stationem non habeant, naves suas ex alto venientes, convocatis in subsidium sociis & vicinis ex Mari in littus pertrahunt, usque eo, quo fluctus Maris transcendere, easque levando tundendoque lædere minime possint. Copiosissima hic in Mari variorum piscium, atque inprimis Alecum captura. His expositis non alienum duxi Coronidis loco adjicere, quod Incolæ harum Regionum Septemtrionalium fuerint & adhuc sint frigidi & sicci, proceræ staturæ, faciei pulchræ, boni coloris, jucundi, læti, suspiciosi, callidi ac in negotiis providi, sani, superbi, amantes suorum, multum comedant ac bibant, bene concoquant, ideoque diu vivant, sanguine abundant, mores severos habeant, & propter cordis calorem, sint pugnaces & rixosi, ament pericula, venationes & peregrinationes, suarum opinionum sint defensores, nihilominus justitiæ memores, in omnibus linguis addiscendis adprime dociles, musarum amantes, & pacta & contractus sancte observent, multos habeant liberos, & quod fœminæ ipsorum difficulter pariant, sintque formosæ & in administratione rei familiaris tenaces & prudentes: ex Catharro autem, morbo regio, angina, pleuritide, fistulis, aqua intercute vel phthisi pleurumque moriantur. Achilles Gassarus testatur hic inventa fuisse a Monacho tormenta bellica.

Commoditas.

Mores.